

Քամույ
քշվածները

Bookmark

Margaret Mitchell

Gone
with the wind

A Novel
Volume 2

BOOKMARK

Մարգարետ Միտչել

Քամույ
քշվածները

Վեպ
Հատոր երկրորդ

Թարգմանությունն անգլերենից՝
Անուշ Սեդրակյանի



ԵՐԵՎԱՆ
2021

ՀՏԴ 821.111(73)-31 Միտչել
ԳՄԴ 84(7ԱՄՆ)-44
Մ 756

Միտչել Մարգարետ
Մ 756 Քանուց քշվածները: Վեպ / Մ. Միտչել; Թարգմանությունն անգլերենից՝
Ա. Սեդրակյանի.-եր.: Newmag, 2021. Հատոր երկրորդ.- 632 էջ:

1936 թվականին հրատարակումից ի վեր Պուլիցերյան մրցանակակիր և բոլոր ժամանակների ամենավաճառվող վեպերից մեկը՝ «Քանուց քշվածները», աշխարհում հռչակվել է Մեծ ամերիկյան վեպ:

Վեպի առավել տարածմանը նպաստել է նաև համանուն ֆիլմը: «Քանուց քշվածները» վեպը մարդկանց կրքերի խորությունն ուսումնասիրում է Ջորջիայի կարմիր բլուրներում տեղի ունեցող դեպքերին բնորոշ հանդգնությամբ: Հիասքանչ պատում է, որը վառ պատկերում է Քաղաքացիական պատերազմի և Վերակառուցման ժամանակաշրջանի դրաման:

Հարուստ կալվածատիրոջ քնահաճ դուստր Սքարլեթ Օ'Հարան հասունանում է ճիշտ այն ժամանակ, երբ Քաղաքացիական պատերազմն ընդմիջտ փոխում է շատերի ու նրա կյանքը: Կրքերի և խիզախության մասին այդ ընդգրկուն պատմության էջերում Մարգարետ Միտչելը ստեղծել է անմոռանալի կերպարներ, որոնք գրեթե մեկ դար պարուրել են ընթերցողի սիրտն ու միտքը:

ՀՏԴ 821.111(73)-31 Միտչել
ԳՄԴ 84(7ԱՄՆ)-44



Գրքի գլխավոր գործընկեր
«Հայաստանի էլեկտրական ցանցեր» ՓԲԸ
www.ena.am

ISBN 978-9939-884-38-7

Copyright © 1936 by The Macmillan Company

Copyright renewed © 1964 by Stephens Mitchell and Trust Company of Georgia as Executors of Margaret Mitchell Marsh. Copyright renewed © 1964 by Stephens Mitchell.

Այս գրքի հայերեն թարգմանության և հրատարակության իրավունքները պատկանում են «Նյու Մեգ» ՍՊԸ-ին:



Bookmark 

Նունվարյան մի ցուրտ օր, 1866 թվականին, Սքարլեթը պատուհանի մոտ նստած երկար նամակ էր գրում մորաքույր Փիթին՝ հերթական անգամ մանրամասն բացատրելով, թե ինչու ո՛չ ինքը, ո՛չ Մելանին և ո՛չ էլ Էշլին չեն կարող գնալ Ատլանտա և ապրել նրա հետ: Նա շատ արագ էր գրում, որովհետև գիտեր, որ առաջին տողերը կարդալուց հետո մորաքույրը հերթական պատասխան նամակն է ուղարկելու, որտեղ բողոքելու է մենակ մնալու իր վախերից:

Ձեռքերը սառել էին, և Սքարլեթը տրորեց ափերը՝ փորձելով ոտքերը տեղավորել կոշիկի տեղ ծառայող կտորի հին ծածկոցի մեջ: Կոշիկների ներբանները մաշվել էին, իսկ որպես կրունկ ծառայում էին գորգից կտրված ներդիրները, որոնք, ճիշտ է, չէին թողնում՝ աղջկա ոտքերը դիպչեն հատակին, բայց չէին էլ տաքացնում: Այդ օրն առավոտյան Ուիլլը ձին տարել էր Ջոնզբորո պայտելու, և Սքարլեթը թախիծով մտածեց, որ անգամ ձիերը կոշիկներ ունեն, մինչդեռ մարդիկ բակային շների պես ստիպված են բոբիկ շրջել:

Նա, ձեռքը վերցնելով փետուրը, ցանկացավ շարունակել գրելը, բայց կանգ առավ՝ հետնամուտքից լսելով Ուիլլի քայլերի ձայնը: Հյուրասենյակից լսվեց նրա փայտե ոտքի դմփդմփոցը, նա կանգ առավ Սքարլեթի աշխատասենյակի դռան մոտ: Սքարլեթը մի փոքր էլ սպասեց նրա ներս մտնելուն և շարժ չզգալով ձայն տվեց: Տղան ներս մտավ, ականջները ցրտից կարմրել էին, շեկ մազերն իրար էին խառնվել: Կանգնեց և կատակախառն ժպիտով նայեց Սքարլեթին:

- Մի՛սս Սքարլեթ,– հարցրեց,– որքա՞ն կանխիկ փող ունեք:
- Դուք որոշել եք շահադիտական նպատակներով ամուսնանա՞լ ինձ հետ,– կեղծ վրդովմունքով հարցրեց Սքարլեթը:
- Ո՛չ, մե՛ն, պարզապես ուզում եմ իմանալ:

Սքարլեթը քննախույզ նայեց Ուիլլին: Նա լուրջ տեսք չուներ, թեպետ երբեք էլ այդպիսին չէր եղել:

— 10 դուլար ոսկով, — պատասխանեց, — այն ամենը, ինչ մնացել է սպանված յանկիի փողից:

— Այդքանը կբավականացնի:

— Ինչի՞ն:

— Հարկերը վճարելուն, — Ուիլլը ծանրորեն նստեց բուխարու մոտ և սառած մատները պարզեց կրակի կողմը:

— Ի՞նչ հարկեր, Ուիլլ, ի սեր Աստծո, հարկերն արդեն վճարել ենք:

— Այո, մե՛ն, բայց այսօր Ջոնզբորոյում խոսում էին, որ այդքանը բավական չէ:

— Չեմ հասկանում, Ուիլլ, ի՞նչ է այդ ամենը նշանակում:

— Ես հասկանում եմ, որ Դուք մեծ բեռ եք տանում Ձեր ուսերին, մի՛սս Սքարլեթ, և չէի ուզենա այն ավելացնել, բայց ստիպված եմ նախազգուշացնել: Ասում են, որ դարձյալ պիտի հարկ վճարեք: Նրանք հաշվարկել են, որ Տառան կոմսության ամենաեկամտաբեր ագարակն է, կարծում եմ:

— Բայց ինչո՞ւ պիտի վճարենք, եթե մի անգամ արդեն վճարել ենք:

— Մի՛սս Սքարլեթ, Դուք հազվադեպ եք լինում Ջոնզբորոյում, ինչի համար ուրախ եմ, քանի որ այնտեղ կնոջ գնալու տեղ չէ: Բայց եթե հաճախ լինեիք այնտեղ, կիմանայիք, որ ստորաքարշների*, հանրապետականների և խուրջինավորների** խմբերն են հիմա տնօրինում բոլոր գործերը: Նրանք ահավոր բաներ են անում, որ Ձեզ հաստատ կբարկացնեն, Դուք կտեսնեք, թե ոնց են նեգրերը հրմշտում սպիտակներին, մայթերից գցում և...

— Բայց դա ի՞նչ կապ ունի մեր հարկերի հետ:

— Քիչ-քիչ մոտենում եմ բուն խնդրին, մի՛սս Սքարլեթ: Այդ սրիկաները բարձրացրել են մեր հարկերի դրույքները, կարծես Տառան հսկայական մի կավվածք լինի: Ես այսուայնկողմ ընկա, նորություններ հավաքեցի ու իմացա, որ ինչ-որ մեկն աճուրդի ժամանակ ուզում է էժան գնով ձեռք բե-

* Ստորաքարշներ (Scallawags) անվանել են սպիտակամորթ հարավցիներին, որոնք սատարում էին Վերակառուցման քաղաքականությունը: Բառը գործածվել է որպես վիրավորական արտահայտություն: (Ծանոթագրությունները՝ newmag-ի):

** Խուրջինավորները (Carpetbaggers) Հարավում ազատ արձակված սևամորթներն ու սպիտակ հարավցիներն էին, որոնք համակրում էին հանրապետականներին: Նրանք միավորեցին իրենց ուժերը Հյուսիսի հետ և շարժվեցին Հարավ, որպեսզի պաշտպանեն հանրապետական կուսակցությանը:

րել մեր ագարակը, եթե հավելյալ հարկերը չվճարեք: Բոլորը վստահ են, որ չեք կարող վճարել: Դեռ հաստատ չգիտեմ, թե ով է աչք տնկել Տառայի վրա, դեռևս չհաջողվեց պարզել, բայց կարծում եմ՝ այդ գարշելի անտառահատ Հիլթոնն է՝ միսս Քեթլինի ամուսինը, որովհետև նա անդուր ծիծաղեց, երբ փորձեցի նրանից մի բան կորզել:

Ուիլլը նստեց բազմոցին և սկսեց տրորել անդամատված ոտքը, որը ցուրտ եղանակներին ցավում էր, իսկ փայտյա անհարմար պրոթեզը նեղում էր: Սքարլեթը կատաղած նայեց նրան: Ինչպե՞ս է նա համարձակվում արտասանել Տառայի դատավճիռը նման տոնով: Եթե շերիֆի աճուրդի ժամանակ Տառան գնեն, ո՞ր են գնալու իրենք: Անհնար է անգամ պատկերացնել, որ Տառան կարող է պատկանել մեկ ուրիշի:

Սքարլեթն այնքան էր զբաղված ագարակը շենացնելու գործով, որ նրա ուշադրությունից վրիպել էին աշխարհում կատարվող իրադարձությունները: Ուիլլն ու Էշլին այժմ զբաղվում էին Ջոնզբորոյի և Ֆայեթվիլի ընթացիկ հարցերով, և Սքարլեթը հազվադեպ էր լքում պլանտացիան: Ժամանակին նա ականջի ծայրով էր լսում հոր երկար-բարակ զրույցները պատերազմի մասին, այժմ էլ նույնպիսի անուշադրությամբ լսում էր Էշլիի և Ուիլլի քննարկումները սպասվող Վերակառուցման* շուրջ:

Իհարկե, նա գիտեր ստորաքարշ հարավցիների մասին, որոնք արագ դարձան հանրապետական, և խուրջինավորներ յանկիների, այսինքն՝ հյուսիսաքնակների մասին, որոնք մորեխների նման գրավել էին Հարավը՝ գորգից կարված ուսապարկերով, որոնք նրանց միակ սեփականությունն էին: Նա մի քանի անգամ անախորժ միջադեպեր էր ունեցել «Ազատագրված մարդկանց» գրասենյակի հետ: Նաև տեղյակ էր, որ ազատագրված նեգրերից ոմանք դարձել էին չափազանց անհարգալից սպիտակների հանդեպ: Այդ լուրերին Սքարլեթը գրեթե չէր հավատում, որովհետև կյանքում ամբարտավան նեգր չէր տեսել:

Անհանգստանալու շատ բան կար, սակայն Ուիլլն ու Էշլին փոխադարձ պայմանավորվածությամբ թաքցնում էին վերջին լուրերը: Պատերազմի

* Վերակառուցում - Ամերիկայի քաղաքացիական պատերազմին (Հյուսիսի և Հարավի պատերազմ) հաջորդող ժամանակահատվածը (1865-77), երբ Համադաշնության հարավային նահանգները վերամիավորվեցին, ամբողջ երկրում ստրկատիրությունը վերացվեց: Վերականգնվեց ազգային միասնությունը, կառավարության կողմից քաղաքական և քաղաքացիական իրավունքներ տրվեցին ազատագրված սևամորթներին, փոխվեցին Սահմանադրությունը և Դաշնային օրենքները:

արհավիրքին հաջորդել էր վերակառուցման ծանր շրջանը, սակայն տղամարդիկ որոշել էին մտահոգող խնդիրների մասին Սքարլեթի ներկայությամբ չխոսել: Երբեմն, երբ Սքարլեթը փորձում էր ունկնդրել նրանց զրույցները, շատ բաներ նրա մի ականջից մտնում, մյուսով դուրս էին գալիս:

Նա լսում էր էշլիի խոսքերն այն մասին, որ նվաճողները Հարավը համարում են իրենց գաղութը և քաղաքական հարցերում առաջնորդվում են վրեժխնդրությամբ: Բայց այդ ամենը Սքարլեթի համար ոչինչ չէր նշանակում, քանի որ, ըստ նրա, քաղաքականությունը տղամարդկանց զբաղմունք է: Ուիլլը համարում էր, որ Հյուսիսն անում է ամեն ինչ, որ Հարավն այլևս չկարողանա ոտքի կանգնել: «Տղամարդիկ, – մտածում էր Սքարլեթը, – միշտ մի տխմար պատճառ կգտնեն անհանգստանալու»: Յանկիներն իրեն վնաս չէին տվել, և նա վստահ էր, որ այդպես էլ կշարունակվի: Պետք է օրնիբուն տքնաջան աշխատել և չմտածել յանկիների կառավարության մասին: Ի վերջո, պատերազմն ավարտվել է:

Սքարլեթը չէր հասկանում, որ խաղի կանոնները փոխվել են, և ազնիվ աշխատանքն այլևս հարգի չէ: Զորջիայում գործում էին պատերազմական օրենքները, յանկիների պահեստազորը տեղակայված էր նահանգում, իսկ «Ազատագրված մարդկանց» գրասենյակը տնօրինում էր ամեն ինչ և ընդունում միայն իր համար բարենպաստ օրենքներ:

Գրասենյակը կազմավորվել էր նախկին Դաշնային կառավարության օրոք, և այդ կառույցի հիմնական նպատակն էր հոգ տանել գործազուրկ և ազատությամբ ոգևորված նախկին ստրուկների մասին, որոնք հազարներով եկել էին ագարակներից, գյուղերից և քաղաքներից: Գրասենյակը պարապուրդի մատնված մարդկանց ուտելիք էր տրամադրում և նրանց մեջ նախկին տերերի հանդեպ ատելություն սերմանում: Զերալդի նախկին վերակացուն՝ Ջոնաս Ուիլկերսոնը, տեղական գրասենյակի ղեկավարն էր, իսկ Քեթլին Քոլվերտի ամուսին Հիլթոնը՝ նրա օգնականը: Այդ երկուսը ջանասիրաբար լուրեր էին տարածում, որ հարավականներն ու դեմոկրատները պատրաստվում են կրկին ստրկացնել նեգրերին, և նման ճակատագրից խուսափելու միակ հնարավորությունը գրասենյակի և Հանրապետական կուսակցության պաշտպանությանն ապավինելն է:

Ամեն ինչից զատ Հիլթոնն ու Ուիլկերսոնը նաև համոզում էին նեգրերին, որ նրանք սպիտակներին հավասար մարդիկ են, որ շուտով թույլ կտան ամուսնություններ սպիտակների և սևերի միջև, որ շուտով իրենց տերերի

ագարակները կմասնատեն հողակտորների, և յուրաքանչյուր սևամորթ կստանա իր հողաբաժինը ջորու հետ միասին: Նրանք նեգրերի մեջ խառնակչություն էին գցում սպիտակների դաժանության մասին պատմություններով, և ստրուկների և տերերի՝ նախկինում ջերմ հարաբերությունները դառնում էին ատելի և կասկածներով լեցուն:

Գրասենյակը զինվորների և աշխարհազորայիների պաշտպանության տակ ընդունում և իրացնում էր իրարամերժ օրենքներ՝ նվաճված բնակչությանը խաղի սեփական կանոնները թելադրելու համար: Մարդկանց նույնիսկ կարող էին բանտարկել, երբ նրանք փորձում էին հակառակվել գրասենյակի աշխատողների ասածներին: Դպրոցների, սանհիգիենիկ իրավիճակի, ապրանքների առուվաճառքի, անգամ կոստյումի վրա կարվող կոճակների վերաբերյալ ընդունվում էին ռազմական օրենքներ, և Ուիլկերսոնն ու Հիլթոնը կարող էին խառնվել Սքարլեթի բոլոր առևտրային գործարքներին, անգամ սահմանել սեփական գները:

Բարերախտաբար Սքարլեթը քիչ էր շփվում այդ երկուսի հետ, որովհետև Ուիլլը նրան համոզել էր առևտրական գործարքները թողնել իր հայեցողությանն ու զբաղվել պլանտացիայով: Իր խաղաղ բնավորության շնորհիվ Ուիլլը կարողանում էր հարթել կնճռոտ հարցերը՝ առանց դրանց մասին Սքարլեթին տեղյակ պահելու: Ուիլլը լեզու էր գտնում նաև խուրջինավորների և յանկիների հետ, եթե ստիպված էր լինում: Բայց այժմ մի հարց էր առաջացել, որն այնքան էլ հեշտ լուծվող չէր: Սքարլեթը պետք է տեղյակ լիներ լրացուցիչ գանձումների և Տառայի հնարավոր կորստի մասին:

Սքարլեթը բոցկլտացող աչքերով նայեց Ուիլլին.

— Օ՛հ, անիծյալ յանկիներ, — բացականչեց նա: — Այդքան մեզ կեղեքել են և թալանել, ժամանակը չէ՞, որ վերջ տան իրենց սրիկայություններին:

Պատերազմն ավարտված էր, խաղաղությունը՝ հաստատված, բայց յանկիներին էին թալանելու, սովի մատնելու կամ տնից վտարելու բոլոր հնարավորությունները: Ի՛նչ հիմար էր նա, երբ կարծում էր, որ պետք է ընդամենը դիմանալ մինչև գարուն, և ամեն բան տեղը կընկնի: Ուիլլի բերած սարսափելի լուրը մի տարի տևած տքնաջան աշխատանքի և խորտակված հույսերի վերջին կաթիլն էր, որը լցրեց Սքարլեթի համբերության բաժակը:

— Օ՛հ, Ուիլլ, ես կարծում էի, թե պատերազմի ավարտի հետ մեր տառապանքները վերջացել են:

— Ո՛չ,– Ուիլլն իր քառակուսի ծնոտով դեմքն ուղղեց դեպի Սքարլեթը և ուշադիր նայեց նրա աչքերին: — Մեր դժվարությունները նոր են սկսվում:

— Որքա՞ն փող են ուզում մեզնից:

— 300 դոլար:

Այդ հարվածից Սքարլեթը մի պահ կորցրեց խոսելու ունակությունը: Երեք հարյուր: Նույն հաջողությամբ կարող էին ասել՝ երեք միլիոն:

— Ինչո՞ւ,– կմկմաց նա,– ինչո՞ւ, ինչո՞ւ, ինչ-որ կերպ պիտի փող ճարենք:

— Այո, մե՛ն, ու երկնքից ծիածան իջեցնենք կամ էլ լուսին, անգամ երկու լուսին:

— Օ՛հ, Ուիլլ, միայն ոչ Տառան, նրանք չեն կարող...

Ուիլլի աչքերի սովորական խաղաղությունը փոխվեց դառը ատելության:

— Իսկ ինչո՞ւ չեն կարող: Կարող են, ուզում են և կանեն իրենց ուզածը: Մի՛սս Սքարլեթ, երկիրը շների բաժին է դառնում, կներեք արտահայտությանս համար: Խուրջինավորներն ու ստորաքարշները քվեարկելու իրավունք ունեն, իսկ դեմոկրատներից շատերը՝ ոչ: Եթե ինչ-որ դեմոկրատ 65 թվին հարկային գրառումներում 2000 դոլարից ավելի գույք ուներ, նա էլ քվեարկելու իրավունք չունի: Այսպիսով, Ձեր հայրը, միստր Թարլթոնը, Մակրատները և Ֆոնտեյն եղբայրները գործընթացից դուրս են մնում: Գնդապետները և պատերազմի մասնակիցները նույնպես քվեարկության իրավունք չունեն: Ձայնից զրկված են նաև նրանք, ովքեր Կոնֆեդերացիայի օրոք պետական պաշտոններ են զբաղեցրել: Այսպիսով, դուրս են թողնում բոլորին՝ նոտարներից մինչև դատավորներ: Յանկիներն այնպես են ձևակերպել համաներման օրենքը, որ պատերազմից առաջ իրենից ինչ-որ բան ներկայացնող ամեն մարդ այժմ զրկված է քվեարկելու իրավունքից: Խելացիները, հարուստներն ու արժանավոր մարդիկ փաստորեն լուսանցքից դուրս են մնացել:

— Հը՛մ, ես կարող էի քվեարկել, եթե տայի դրանց հիմար երդումը: Ես 65 թվին ոչինչ չեմ ունեցել, փող չունեմ, սպա չեմ ու ոչ էլ մի երևելի կերպար եմ: Բայց ես երդում տալու ոչ մի ցանկություն չունեմ: Եթե յանկիներն իրենց կարգին մարդու պես պահեին, միգուցե և ընդունեի հավատարմության երդումը, իսկ հիմա ոչ մի դեպքում: Ես կարող եմ միանալ Դաշնությանը, բայց չեմ ցանկանում մասնակցել այդ մեծ Վերակառուցմանը: Ապա մի նայեք, Հիլթոնի և Ուիլկերսոնի պես ստահակները կարող են քվեարկել, Սլեթերի թշվառականները և անպիտան Մակինտոշները՝ նույնպես: Հիմա

բոլոր լծակները նրանց ձեռքերում են: Եթե մտքներին դնեն տասնապատիկ հավելյալ հարկ գանձել Ձեզնից, այդպես էլ կանեն: Հիմա սևամորթը կարող է անպատիժ սպանել սպիտակ մարդուն կամ...,- նա շփոթված կանգ առավ՝ հիշելով, թե ինչ կատարվեց Լավջոյի հեռավոր ֆերմայում ապրող միայնակ կնոջ հետ: — Նեգրերն ամեն բան կարող են անել մեր գլխին: Ե՛վ «Ազատագրված մարդկանց» գրասենյակը, և՛ զինվորները կպաշտպանեն նրանց: Ու մենք ո՛չ ձայն հանելու իրավունք ունենք, ո՛չ էլ մի բան անելու հնարավորություն:

— Քվեարկե՛լ,- բացականչեց Սքարլեթը,- քվեարկե՛լ, ի՞նչ կապ ունի քվեարկությունն այս ամենի հետ, Ուի՛լլ: Մենք հիմա հարկերն ենք քննարկում, Ուի՛լլ, բոլորն էլ գիտեն՝ ինչ բարեբեր պլանտացիա է Տառան, ի վերջո, մենք կարող ենք այն գրավ դնել:

— Մի՛սս Սքարլեթ, Դուք բնավ հիմար չեք, բայց մեկ-մեկ անմիտ բաներ եք ասում: Ո՞վ փող ունի, որ Ձեզ գրավի դիմաց պարտքով տա, իհարկե, խուրջինավորներից բացի, որոնք էլ փորձում են ագարակը վերցնել Ձեր ձեռքից: Բոլորն էլ հողերի տեր են, հողը բարիք է տալիս, այն կորցնել չի կարելի:

— Ես ադամանդե ականջօղեր ունեմ յանկիից վերցրած: Կարելի է դրա դիմաց ինչ-որ գումար ստանալ:

— Մի՛սս Սքարլեթ, ո՞վ փող ունի զարդեղենի համար: Մարդիկ անգամ մսի փող չունեն, ինչո՞ւ պիտի ծախսեն զիզի-բիզի բաների վրա: Դուք գոնե 10 դոլար ունեք ոսկով, մարդիկ կան՝ դա էլ չունեն:

Լռություն տիրեց: Սքարլեթին դարձյալ թվաց, թե գլուխը հարվածում է քարե պատին: Անցյալ տարվանից նրան արգելքներ են շրջապատում, որոնք նա ստիպված է հաղթահարել:

— Ի՞նչ ենք անելու, մի՛սս Սքարլեթ:

— Չգիտեմ,- անտարբեր պատասխանեց Սքարլեթը՝ զգալով, որ իր պետքն էլ չէ: Հերթական արգելապատնեշը խոյացավ նրա առջև, և զգաց, որ հոգնածությունից անգամ ոսկորները սկսեցին տնքալ: Ինչո՞ւ է նա իրեն մաշելով գործում և պայքարում, եթե ամեն ջանքին հաջորդում է պարտություն, կարծես ճակատագիրը ծաղրում է իրեն:

— Դեռ չգիտեմ: Բայց հայրիկին ոչինչ չասես, նա կարող է հուզվել:

— Չեմ ասի:

— Ուրիշ մեկին բան ասե՛լ ես:

— Ո՛հ, ես ուղիղ եկա Ձեզ մոտ:

«Դե, իհարկե,– մտածեց Սքարլեթը,– վատ լուրերով բոլորը գալիս են ինձ մոտ, և ես սարսափելի հոգնել եմ այդ ամենից»:

— Իսկ որտե՞ղ է պարոն Վիլքսը: Գուցե նա էլ մի բան առաջարկի:

Ուիլլըն իր հանգիստ հայացքը հառեց Սքարլեթի դեմքին, և աղջիկը զգաց, որ էշիի գալու առաջին օրից Ուիլլըն ամեն ինչ հասկացել է:

— Նա այգում ճյուղերն է կտրատում: Երբ ձին կապում էի, նրա կացնի ձայնը լսեցի: Բայց նա մեզ պես փող չունի:

— Ինքս կորոշեմ՝ երբ խոսեմ նրա հետ,– կտրուկ ասաց Սքարլեթը: Նա ոտքի ելավ և ոտքերին կպած կտորը մի կողմ շարտեց:

Ուիլլըն ցույց չտվեց, որ վիրավորվել է, և, շարունակելով ձեռքերը շփել կրակի վրա, նկատեց.

— Դրսում խոնավ է, մի՛սս Սքարլեթ, ճիշտ կանեք՝ շալ վերցնեք:

Բայց Սքարլեթն առանց շալը վերցնելու շտապեց դուրս, որովհետև կարիք ուներ վայրկյան առաջ տեսնել էշիին և խոսել նրա հետ իր բոլոր մտահոգությունների մասին:

Ինչ բարեբախտություն կլիներ, եթե էշին մենակ լիներ: Նրա գալուց ի վեր Սքարլեթին դեռ չէր հաջողվել հետը մի բառ փոխանակել: Էշին միշտ շրջապատված էր մարդկանցով, Մելանին էլ միշտ նրա կողքին էր և անընդհատ դիպչում էր ամուսնու թևքին՝ կարծես նրա ներկայության մեջ համոզվելու համար: Այդ մտերմիկ ժեստը Սքարլեթի մեջ ատելության փոթորիկ էր արթնացնում, որը պատերազմի տարիներին մեղմվել էր, որովհետև Սքարլեթը կարծում էր, թե էշին մահացել է: Այժմ Սքարլեթը վճռական էր տրամադրված, պիտի դեմառդեմ խոսի էշիի հետ, և ոչ ոք ի զորու չէ իրեն խանգարել:

Նա անցավ այգու մերկացած թփերի մոտով, և մուլախոտերի ցողից ոտքերը թրջվեցին: Լսվում էր կացնի ձայնը: Էշին կտրատում էր ճահճից դուրս բերած գերանները: Պետք էր նորոգել ցանկապատերը, որոնք յանկիները կրակի էին մատնել, իսկ դա ծանր գործ էր: Շուրջը եղած ամեն ինչ նորոգելու համար ջանք էր պահանջվում, նա հոգնել էր, սպառվել և ուժաթափվել: Եթե միայն էշին իր ամուսինը լիներ, ի՛նչ հաճելի կլիներ մոտենալ նրան, գլուխը դնել ուսին, հեկեկալ և նրան հանձնել իր վրա ծանրացած բեռը:

Նա շրջանցեց սառը քամուց դողացող մերկ ճյուղերով նռնենիների պուրակն ու տեսավ էշիին՝ կացնին հենված: Էշին ափով սրբում էր ճակատի

քրտինքը, հագին իր հնամաշ դարչնագույն շալվարի ցնցոտիներն էին և Ջերալդի վերնաշապիկներից մեկը: Դարսերով վերնաշապիկը, որը Ջերալդը հագնում էր միայն դատարան կամ հյուրասիրությունների գնալիս, շատ կարճ էր նրա համար: Էշլին քրտնել էր, բաճկոնը կախել ծառի ճյուղից, որովհետև շատ շոգ էր, և հանգստանում էր:

Տեսնելով Էշլիին ցնցոտիների մեջ, կացինը ձեռքին՝ Սքարլեթը սիրո ջերմ ալիք զգաց և միաժամանակ վրդովմունք անողոք ճակատագրի հանդեպ: Անտանելի էր նայել ցնցոտիավոր, աշխատանքային բեռի տակ կքած Էշլիին, որը միշտ այդքան անթերի և վայելուչ տեսք ուներ: Նրա ձեռքերը նախատեսված չէին կեղտոտ աշխատանքի համար, նրան կսազեին միայն նուրբ սպիտակեղենն ու անթերի հագուստը: Նախախնամությամբ նրան սահմանված էր նստել շքեղ հյուրասենյակում, զրուցել հետաքրքիր մարդկանց հետ, դաշնամուր նվագել և ստեղծագործել անիմաստ ու սիրուն բանաստեղծություններ:

Սեփական երեխայի բարուրի կտորից կարված շապիկը, կոպիտ կտավե զգեստներ հագած քույրերի տեսքը, Ուիլլի անխոնջ, տքնաջան աշխատանքը. այս ամենի հետ կարելի էր համակերպվել, բայց Էշլիի վիճակի հետ՝ երբեք: Նա անմեկնելիորեն հարազատ էր Սքարլեթին, նա արժանի չէր այս ծանր փորձություններին: Սքարլեթը սիրով ինքը կհատեր գերանները, եթե կարողանար դա անել Էշլիի փոխարեն:

— Ասում են՝ Աբրահամ Լինկոլն իր առաջին քայլերն արել է գերանները կտրատելով, — ասաց Էշլին, երբ Սքարլեթը մոտեցավ նրան: — Պատկերացրո՛ւ, թե ինչ բարձունքների կարող եմ հասնել:

Սքարլեթը խոժոռվեց: Էշլին միշտ կատակով էր խոսում իր դժվարությունների մասին: Սքարլեթը բոլոր իրադարձություններին շատ լուրջ էր վերաբերում, և երբեմն Էշլիի խոսքերը նյարդայնացնում էին նրան:

Նա համառոտ պատմեց Ուիլլի բերած նորությունների մասին և զգաց, որ այդ ամենն իրեն թեթևություն բերեց: Սքարլեթը վստահ էր, որ Էշլին կօգնի: Վերջինս ոչինչ չասաց, բայց, տեսնելով, որ Սքարլեթը դողում է, իր վերարկուն գցեց նրա ուսերին:

— Դե՛, — հարցրեց Սքարլեթը, — մտքովդ չի՞ անցնում, թե որտեղից կարող եմք փող ձարել:

— Չգիտեմ, — ասաց Էշլին, — որտեղի՞ց:

— Ես քեզ եմ հարցնում, — ասաց Սքարլեթը նեղսրտած: Թեթևության